

REGIONAL NEWS

DAMPA MLA PASSED AWAY AT 55

Dampa bialtu MLA Pu Lalrintluanga Sailo ruang chu vawiin khan Mizoram phurh thlen a ni a, Lengpui Airport ah mi thahnem takin an lo hmuak a, a ruang hi zaninah lumen a ni ang.

Puan tawh angin Dampa bialtu MLA Pu Lalrintluanga Sailo hi MAX Super Speciality Hospital, Delhi-ah nizan khan kum 65 mi niin a thi a, AIIMS Hospital ah a ruang chhiat lohna atana sawngbawl tura phurh pheii niin Max Hospital ah tawngtaina nen thlah a, a ruang hi vawiin khan Mizoram phurh thlen niin zanin lumen hnuah naktuk hian Luangmual Presbyterian Kohhran Centenary Hall ah vui a ni ang.

Pu Lalrintluanga Sailo ruang hi Delhi cham mek Rajya Sabha MP Pu K. Vanlalvena, Mizoram sawrkara Home Minister Pu K. Sapdanga leh Speaker Pu Lalbiakzama bakah Lok Sabha Speaker Pu Richard Vanlalhmangaiha ten an thlah a ni.

Pu Lalrintluanga Sailo hi a khawsik nasat avangin June ni 29 khan Delhi panpui a ni a, Max Hospital-ah hian ni khat ward-a a awm hnuah ICU-ah dahluh a ni a, hun rei tak a damloh hnuah nizan dar 9 khan a thi a ni.

Kum 1960 a piang Pu Lalrintluanga Sailo hi kum 16 mi a nihin Mizo National Front underground movement a zawm a, kum 1986-a Mizo Peace Accord ziah anih hnu khan Pu Laldenga personal driver hna a thawk leh a, MNF ticket in kum 2018 leh kum 2023 khan Dampa bialah thlan tlin a ni.

Pu Lalrintluanga Sailo hi Luangmual vengah chengin a nupui Pi Lalbiakthuami leh a fate 5 a kalsan a, Luangmual Village Council ah kum 12 chhung a zawnin vawi 4 thlan tlin alo ni tawh a, Mizoram Football Association ah term hnih chhung Executive member a ni bawk.



CM, GUV CONDOLES DEATH OF DAMPA MLA

Dampa bialtu MLA Pu Lalrintluanga Sailo nizana thi chu Larsap Gen (Rtd) Vijay Kumar Singh leh Chief Minister Lalduhoma bakah party hrang hrangin an ui thu an sawi.

Larsap chuan Pu Lalrintluanga Sailo thi chu an ui takzet tih sawiin a chhungte a tawrhpuu thu a sawi a, Mizoram tana a hnathawh te an hre reng tawh dawn tih a sawi.

Chief Minister Pu Lalduhoma chuan Pu Lalrintluanga Sailo chu an ui takzet tih sawiin Legislator tha leh taima, thusawi thiam leh debater ropui an chan chu pawu atih thu a sawi a, Sawrkar pawhin a tihtur apiang ati zel dawn tih a sawi.

MNF Senior Vice President Dr. R. Lalthangliana chuan MLA Pu Lalrintluanga Sailo chu MNF Party tana mi tangkai, party-a General Secretary leh thalai hruaitu te pawh lo ni tawh a nih thu sawiin MNF Party Legislature Party Leader ni mek a nih thu a sawi a. A hmuruak luah khah a har hle dawn tih sawiin party ang pawha an ui takzet thu leh ram pum huap pawha mi uiawm tak a nih thu a sawi.

Mizoram Pradesh Congress Committee (MPCC) President Pu Lal Thazara pawhin MLA Pu Lalrintluanga Sailo a kal ta mai chuan a thawn thu sawiin ram leh hnam kaihhruainaa mi thahnemngai a nih thu leh a bial te ngaihsak a nih thu a sawi.

Pu Lalrintluanga Sailo hi ram hruaitu hrang hrang leh pawl hrang hrang ten an ui thu an sawi a ni.



MZP PRESS CONFERENCE

MZP President Pu H. Lalthianghlina'n Mizoram ei leh bar lakluhna kawng kal hleihtheih loh khawpa a chhiat laia chawlh la NHIDCL Executive Director chu Mizorama let leh tawh lo tura an hriattir thu a sawi.

Pu H. Lalthianghlina chuan MZP rorelna sang ber dawttu Federal Council vawi 59-na chuan, NHIDCL hnathawh a that tawh loh thin avangin, MZP in a that zawk theih nan hma la chhunzawm zel rawh se tia an rel thu a sawi a. Hemi chungchângah hian tun thla ni 17 khan NHIDCL Executive Director Virendra Jakhar sawipui tum ni mahse chawlh a lo lak avangin an hmuh theih loh thu a sawi a. MZP chuan Mizoram ei leh bar lakluhna kawngpui pawimawh em em, kal hleih theih loh khawpa a chhiat laia NHIDCL hotupa ber Executive Director-in August ni 7 thleng chawlh ala daih mal chu hriatthiam har an tih thu a sawi a. Mizo mipuite hmusittu NHIDCL Executive Director chu Mizoram a awm tlakah MZP chuan

a ngaih loh bakah, a deputation term a tawp tawh avangin, a term pawhsei a remti lo tih a sawi a. NHIDCL Executive Director chu Mizoram-ah lo let leh tawh lo turin a hriattir nghal tih a sawi a ni.

MZP President chuan fur khaw chhiat vanglai taka, NHIDCL Executive Director-in chawlh a la chu MZP chuan mak a ti hle tih sawiin lirthei khalhtute mangang au thawm pawh engahmah ngai lova, a ral thlir mai mai chuan Mizoram mipuite an hmusit hleah an ngai tih an sawi a. Riltama Mizoram mipuite an thih mang vek pawh pawi an ti loah an ngai tih sawiin MZP chuan tun thla chhung ngela NHIDCL-in an enkawl kawngpui chhe zual lai Motor kal theih tura thuam tha vat turin a phut tih a sawi a. An hmalak dan MZP in uluk takin a vil dawn bakah, a tul angin a bawhzui zel dawn thu a sawi a ni.



GOVERNOR

Larsap Gen (Rtd) Vijay Kumar Singh chuan ram leh hnam inghahna ni mai tur thalaite chu hruaitu tha leh danglamna thlen theitu ni tura an inbuatsaih lawk a tul tih a sawi.

Vawiina Mizoram State Bharat Scouts & Guides Chief Patron atana Mizoram Bharat Scouts & Guides State Chief Commissioner Pu H. Lalhmingthanga'n Durbar Hall, Raj Bhavan-a a lakluhnaah he thu hi sawiin Larsap chuan Scouts & Guides hlutna, inthununna leh rawngbawlnate zahawm a tih thu leh khawvela thalaite beihpui thlaknaa nghawng nei lian berte zinga mi a nih thu a sawi a. Mahni duhthlanna, politics rawng kailo leh zirna kawnga hmalakna hmanga thalaite hmasawinna tluantling petu a ni, a ti a. India rama bultan a nih hun, kum 1909 atangin chak takin ram pumah nunphung tha inzirtirna leh vantlang rawngbawlina lama hmalak a nih thu a sawi a. Tunah chuan khawvela ram 216 a thalai maktaduai 67 te'n he pawl hi an zawm tawh tih sawiin thupui thlan 'Once a Scout or Guide, always a Scout or Guide' tih chuan member-te nunah hmun a chan kumkhua thin dan a nemnghet a ni, a ti.

Larsap chuan Chief Patron a nihna zawnah Mizoram Scouts & Guides hmasawn nana theihtawp chhuah a tum thu sawiin, Mizoram District hrang hranga khua leh school-a thalaite'n he hmalakna hi an zawm vek theih nana tan lak puiah kalkhawmte a sawm nghal a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



ISRO

Indian Space Research Organisation (ISRO) leh American Space Agency NASA tangkawp siam, NISAR Earth Observation Satellite chu karleh ni 30 hian Shriharikota atangin an kap chhuak dawn.

GSLV F16 heavy lift rocket hian satellite hi km 743-a thui Sun Synchronous orbit-ah a kap chhuak dawn a ni.

